

使秦草

德清蔡公以康熙五十二年春奉

天子命入秦祭告兼歷全省營伍犒賞軍士是歲

皇上六旬萬壽行慶施恩百禮具舉禋祀賞賚神

人胥洽秦疆域甲天下華岳黃河在其封內

古帝王陵寢自軒轅以下咸載祀典而邊陲

遼遠師旅勤勞尤爲

九重所軫恤用是慎簡近臣銜

詔西徂公以清華重望侍

禁闈久親見

聖天子敬天愛人籌邊講武無一不厯於宵旰宜其仰體

聖衷祇事宜惠以對揚

簡命事竣還闕公手錄其道途題詠哀集成帙曰使秦草屬余爲之序余嘗謂帝王功德隆盛必有文學之臣以鴻詞鉅筆鋪張其休美播之四方垂之萬禩我

皇上誠格幽明道綜文武五十餘年昌熾之運日升月恒廷臣歡踴咸思作爲文章賡揚大業

而公馳驅關隴旣能宣廣

主上之德意復以餘力拜颺賦咏今讀其詩體正而麗氣壯而和颯颯乎三百篇之遺音發乎性情諧乎律呂洵足以形容美盛鼓吹休明者也詩三百篇大率紀載政治其言祭告則曰懷柔百神言出使則曰王事靡盬至於采薇采芑諸詩憫士卒之任勞美軍容之孔武指事矢音悉與政治相表裏然則使秦一編采掇國風敷陳雅頌深有得於四始六義之

旨而藉是以紀大祀大賚之政典昭德象功
奏明堂而薦清廟顧不偉與余讀之卒業鼓
舞嘉歎自忘其譏陋而序之如此

遂寧張鵬翮

使秦草序

國家定鼎幽都地接陪京禁旅百萬屯宿於內
蕃落四十九部環衛於外斥北境幾萬里踰
瀚海絕沙漠放乎無垠我

皇上神武者定四海尤加意關中兵拔其雄傑材
武自卒伍爲節鎮者布列於天下而關隴河
湟之間帶甲十萬簡畀將帥授之方畧撫柔
訓練皆秉

睿謨故秦兵之精甲於天下以此控制九域形格

威讐足以維萬世之安五十有二年

聖壽初登六旬施慶中外遣大臣祭告天下名山川頒大賚於軍士省各二員而使秦者獨以屬德清蔡公不置副蓋公以公忠諒直結主知而沈毅多大畧舉厝適機宜

上旣視關中爲股肱故任公以心膂所以播德宣威行激勸於校閱寓廉察於賚予非徒任四牡之勞增皇華之重而已秦中將吏聞公特使皆相誠幕井俯芻豢之境上見有肩輿自

東來從數騎襆被蕭然初不意公至問知之乃大驚公自置供頓秋毫不以煩倌人閭井晏如若不知使星之涉其地也者民大悅先是苦旱公輶軒所歷雨輒隨之民皆呼爲蔡公雨焉公善於撫納接見諸將校宣

上所以勞苦士大夫念邊兵之在行間者意良厚人人感奮鼓舞軍士聞之有泣下者賞未行而人心已翕然矣或謂公曰在籍者不必在伍覈隱占以杜支冒則節省可以爲公功公

曰不然

聖天子溥湛恩期於霑漑靡有遺也意豈在省縮哉指劾隱石傷將吏心且使人聞之謂卒不備伍此聲非所以風示羌蕃也吾令將吏自除所占帑實無敢冒而寬大歸於

朝廷實力彰於邊鄙所裨孰多於是將吏皆深德公公內察外和治劇如暇是役也歷重鎮八其餘營堡不可勝數資軍士十餘萬無一人濫以遺有卧病不能自前者召其妻孥受

賜校閱之日三軍列陣以次呈技公憫其久立不任勞命坐隊以須故終日閱而士不疲或雪後甚風邊寒墮指則先期飭所司構席爲棚周布閱場儼若廬井軍中人人挾纊皆呼

萬歲於是射者中馳者嫻火噐霆發於羽鳥變公則獎厲其將領指示曰某某最某某次之所摘發皆洞其微雖宿將莫不驚服自以爲不及故公之名震於秦隴近塞諸番奔走願識

公面所至擁馬首常數十百人及其竣事東
還而穹碑之樹於路者彌望千里不絕皆軍
士相與銘德紀功而頌

天子之知人善任惠我無疆者也予鄉人來所傳
述者其畧如此予以謂秦中形勢旣爲

神京右輔其士勇而知方又

上所教養數十年之久今公一出使而播德宣威
人人益奮其偕作敵愾之忠於以揚聲靈而
極震疊豈非人臣之極則

熙朝之盛事哉凡我百爾俱宜作爲歌詩長言
永嘆繼吉甫穆如之頌而公之歸也出橐中
藁若干篇固已脩風雅之美矣雖有工者未
易賡而和也予無所申其意乃撫所聞公之
行事而爲之序雖不能文聊以存其質云爾

年弟張廷樞拜藁

夫卿雲旦縵賡歌發自蓋誠梧日雖喑獻納
歸於忠愛馬班賈董炳兩漢之文章燕許常
楊麗三唐之制作入則宣麻視草潤色堯階
出則載筆停驂采風禹甸簡書夙夜大臣樹
望於崧高韞矢馳驅候吏迎窺夫星曜鏤金
刻石配雲雨以濡霑締武經文走雷霆而精
銳所以揚無前之偉績斯克荷殊渥之勝逢
振古有光於今爲盛歲當癸巳春屆青陽遇
皇上六旬萬壽之辰攄臣民三祝九如之悃東西

南朔熙皞同遊天地山川太和保合

隆恩溥博戶給家施善氣懽忻衢謠壤擊明禋徧
告河岳懷柔實惠遐頒貔貅踴躍

咨鴻儒於東閣策輶傳於西秦先生於是手捧十
行心馳六轡碧蓮縹緲晴分仙掌三峯紅旭
網緼曉闢潼關四扇控涇帶渭勝擅沃野隩
區吐鎬欬艷秀甲神臯天府昭茲琮琥秩秩
視公薦以馨香森森修貢十三陵寢披歷代
之松雲百二提封聚幃帷之藻采而乃旌旂

夾道檠戟兼程飭邊備於長榆閱軍容於細
柳自咸陽而循湟隴經銀夏而履朔方月駟
雲螭花濃金埒珣戈繡鎧霞蔚儲胥聽鼓張
旃何止魚麗之陣籠山絡野非惟鶴列之師
喻之以

聖武神威宣之以深仁厚澤恩逾挾纘賚

內帑之朱提感重投醪騰酒車之醞醪閱歷秋
冬令序往還千萬津塗時則官燭雙然薰爐
百和研涵蟾滴箋界烏絲片刻而揮灑神來

墨如磨盾四顧而躊躇意滿技似穿楊弘以
漢京班孟堅聞而却步學乎舊史張平子見
而改容較浣花西嶽之篇旣料量夫繁簡比
昌黎南山之什亦損益乎質文真可黼黻
皇猷丹青弘化者矣廷錫夙瞻光霽久躡後塵紫
闥岩巖企達鴻之漸羽皇華寵餞慕吟鷺之
陪軒旋迓輪轅欲溯河源星宿俯貽緇帙况
探玉井波瀾鳳詔傳觀雞林遠購乃知於役
之時偏暇方信懽愉之詠彌工鈞軸懷中原

熟諳夫韜畧絲綸腕下亦借助於江山簸以
糝糠愧乏穆如之誦垂諸琬琰常聆藉甚之
聲云爾康熙丙申十二月朔南沙後學蔣廷
錫謹序

陝西古秦地昔人稱其被山帶河四塞以爲
固外有洪河之險西有漢中巴蜀北有代馬
之利天府之國自漢武表河西列四郡通西
域其民皆修習戰備高上勇力有車犇駟載
之風歌謠慷慨風流猶存而隴西六郡尤天
下勁兵處

國家統一海宇定兵制長駕遠馭博慮深謀於
秦地尤加毖焉我

皇上御極之五十二年

聖壽初登六十加恩中外濺澤滂流再命大臣祭
告天下名山大川賞賚鎮衛屯營軍士有差
於是德清蔡公以內閣學士禮部侍郎往使
秦中輜軒所至攬關塞之要害歷山川之雄
險境與意觸一發之於詩散華落藻若金奏
之作乎東序縣鼓應而振鷺飛也若騁騏驥
於長途超忽滅沒朝陽紆夕春澤也若觀伯
天氏之河典玉果璿珠錯落磊砢而眩乎目
也詩至此亦盛矣余觀古者采薇以遣戍出

車杖杜以勞還悲閔其渴飢而隱卹其家室
重言累歎有餘情焉而皇皇者華之遣使臣
也願其臣揚君之美延譽於四方而勉以諏
謀詢度之六德竊嘗綜而論之兵戎爲國家
重寄古先王之於其民金革之事惴惴乎不
忍輕試也當其急而及鋒而用之則繕其怒
時其暇而優游以養之則萃其和故有采薇
杖杜忠厚悱惻之誠夫然後有雷霆噴焯之
威江漢翰飛之勇和之蓄也肫然斯怒之作

也勃然所以爲王者之師也若臣之於君也
旣奉君靈寵馳驅四方亦唯君之德音容典
張皇申播以光顯乎區夏其總轡踟躕觀省
謠俗於民瘼國卹三致意焉以反命於君俾
周知天下之故此使臣之職所以盡靡及之
懷而禮樂光華遠而益耀也我

皇上神武天縱邊塞軍旅之務默制於

睿謨所以和柔之者至矣茲又特加大賚以大臣
董其事惠莫厚焉寵莫加焉而公於是時肅

將成命布

聖德之廣淵宣勞徠之款悵拊循將士激勵忠義
作爲歌詩鏗鎗震厲高華鴻朗天下讀公詩
者皆如覩小雅之材而觀禮樂之盛殆追采
薇杖杜之纏綿而兼皇華之六德矣乎豈直
車麟駟載振夏聲而雄西氣已哉昔宋知制
誥盛度以學士奉使陝西嘗遍覽疆域叅質
漢唐故地繪圖以獻時稱其博洽今讀公使
秦之詩則雍梁山川形壤俱在宮商含咀之

問不待披圖視典而目遇之則度之圖其猶
未逮夫折楊黃華之一笑也夫長洲後學徐
昂發拜手謹撰

聖壽如山抃舞徹乎

九陛

君恩似海德施普於萬邦雍州本帶河枕華之區
塞上多擊柝建旗之地明神一氣薦以馨香
壯士四方錫之酒醴太平之儀禮學士之遭
逢也德清公入贊黃扉出承

丹詔紅雲北望祇捧玉皇紫氣西來仍迎柱史過
關中周漢之京邑瞻歷代帝王之寢園山川
環拱萬戶寒星松栢鬱葱千秋石馬迺虔邊

實迺奏笙歌迓此洪休歆於明德奉

簡書而往矣拊軍士而勉之自三輔至五郡之遙
馳驅萬里由羽林及繇戍之衆推解一心頒
內府之金錢仰中朝之符璽供億簡而無擾
賚予均而不偏觸暑冒霜克恭使命植碑封
樹咸荷

皇慈於此覽道路之險艱感年時之災祲宣揚
聖德通達輿情豎牧婦樵每停車而問俗塞雲邊
月間執蓋以賦詩類事成章出詠入告禮嘉

四牡騅飛苞集之思道贊六龍雲行雨施之
澤周內史之掌賞賜唐侍郎之持冊書慶賀
有文達行人之六節拜稽以頌祝

天子之萬年嘉定後學張大受謹書卷後

使秦草

茗南蔡升元方麓著

康熙五十二年癸巳恭遇

皇上六旬萬壽覃恩中外臣升元奉

命秦中祭告兼賞閱全省綠旗官兵恭紀

仁壽推恩萬福同

詔書頒處徧呼嵩薦馨歷代明禋肅布愷三軍曠
典隆秦隴兵車甲天下帝王陵寢半關中祭告

凡十
三處
况經

翠輦巡行地先採衢歌譜國風

五月二十六日出故關

漫說升天險由來行路難
雄關一柱障怪石
萬星攢樹密稀禽語泥深沒
馬鞍那堪逢驟雨澗道發奔湍

二十七日抵壽陽縣

驅車古道晉陽東社鼓
唧唧祝歲豐穴處岩耕衣
大布由來崇儉是唐風
過新興鎮土人遺余蠶繭
盈掬皆黃色

蠶事依然似故鄉
勻圓細繭色偏黃
纒絲正在薰風候
織得山龍補

舜裳

太原道中

遠上坡陀仄徑幽
馬蹄得得不曾休
懸崖下瞰常千尺
曲磴纔過又一丘
饁婦晨炊山頂屋
征夫午炙碛中溝

兩山夾立一路深窄如溝行人當午尤苦炎熱

路回漸喜涼風至
汾水西來百折流

介子推廟

身隱焉文志最堅空勞身後賜綿田年年麥
飯東風裏贏得芳名說禁烟

淮陰侯廟 二首

劉項興亡繫一身功高震主易生嗔假王本
爲安齊計未必初心便要真

天授明知屬沛公何妨絳灌與和同殘碑尚
有原情論幸不當時聽蒯通

渡河 卽風陵渡此黃河九折之一也

九曲流纔一東來路更西風陵晴浪淺夏廟

夕陽低渡口揚征旆城頭靜戍鼙秦兵初拜
詔萬騎早排堤

潼關

秦晉中分地潼津扼要衝一關嚴戶鑰萬里
息邊烽北枕洪流渡西環太華峰河山百二
固天險首崇墉

望華

如石亦如雲非烟亦非霧聞是神仙居定有
蛟龍護馬首自東瞻橫亘潼津渡裂石作關

門咸京束險固循塗嶽麓行延袤無紀數峩
然白帝宮登樓日瞿瞿巨靈擘芙蓉三峰若
繪塑峻嶒五千仞并無飛鳥度絕頂撐青天
天梯未得路有客來揖余袖中出絹素染成
廿四圖八景續新故山頭四面方山形五指
具朝霞爛晨暉高掌儼承露澗南歷青柯坪
間可小住北徑入車箱谿訝莽盤互玉井西
峰巔井泉懸瀑布冪洞下長空一綫銀河注
崧高日觀峰萬里在指顧極目滄溟東二曜

迭吞吐溶溶沐雲水仙去雲常駐

卽王女洗頭盆圖名

沐雲留跡

離離摘星臺天低星欲雨杓光毛女壇

鳥道將軍樹昌黎好奇僂登之直啼諄天門
徑愈微箭括不容屨最險擦耳崕蟹行猶畏
仆異哉全真岩大字平空署萬點青綠尖森
羅劍鋒聚千行蒼翠松恍惚風濤怒或境接
廣寒清虛逼皓兔或景擬瑤臺層級鋪連璐
更有絕大竒筆墨難言喻陰陽闢鴻濛頃刻
變朝暮夕照倒景光大地山河曙此是太華

圖一一爲君註對山看圖畫靈境目前遇不
羨少陵詩詎數楊恭賦卧遊形神馳陟覽心
魂怖可望不可升欲前還却步老子鍊丹竈
希夷藏蛻處遺跡空悠悠披圖亦浮慕勝地
迫王程信宿戒徒御回首蓮峰高徘徊不忍
去

驪山

自昔唐宗駐翠華楊家姊妹七香車星河秋
夜長生殿溫谷春風解語花菊部按時催羯

鼓霓裳曲裡隱邊笳馬嵬坡樹驪山栢一樣
悲風噪暮鴉

溫泉

天寶傳遺事宮車此舊過金鈿留翠巘紅汗
落清波水殿回春早林花就暖多風流誰復
見繡嶼鬱嵯峩

長安

立馬長安思不禁遺踪俯仰歎銷沉終南雲
氣無昏曉渭北河聲自古今漢殿秦宮荒草

合杜陵韋曲落花深於今四海為家日短遂
休吹塞上吟

祭告禮成恭紀

嵩呼萬國徧懷柔列聖先崇祀典脩百二河

山天府國十三陵寢帝王州橋峰畢郢留殘

碣

文武成康陵
俱在畢原

石馬珠襦付古丘

漢諸陵俱
用珠襦王

匣今日拜瞻靈爽格昇平奕禩荷神庥

卽事

敷天湛露

主恩濃首及秦關百二重大祀告成兼大賚禮容
整罷看軍容

西安頒賞

秦中古稱四塞國因河踐華雄西陲神臯與
區得地利重兵彈壓關安危我

朝軍旅邁前代創立規制軒皇遺八門旗色別

五彩滿漢內外聯網維鎬京增設虎賁士大

帥統之環城啤

西安設滿洲兵將
軍所轄別為內城

更有漢軍

十萬衆提鎮倚揜遙相依地險兵多將士銳

傳奉草
六
悉隸制府官台司維

皇西顧慎乃選福星重自荆湘移向來滇撫秉節
鉞今控川陝連羗戾側聞公暇勤講武信賞
必罰宣

恩威我初奉使頒大賚陳兵迎

詔羅星碁萬騎千屯如江漢冠軍偏將皆熊羆南
山咫尺閱武堂熏風拂拂牙門旂健兒挽強
開滿月名駒弄影追干霓鏗轟礮石撼地軸
晶熒戈甲揚晨曦笳吹三聲鼓三發推演陣

勢何神奇方圓分合妙運用不減鵝鸛同魚
麗明年春半我再過重觀壁壘增光輝教成
餘丁倍雄糾勇力欲縛生狻猊左射右射穿
七札有嚴有翼森重圍固知訓練蓄士氣干
城隱具磐石基國家有脩洵無患諄諄提命
宸謨垂况乃給賞遍什伍恩深挾纊充邊衣細柳
原頭朝翠合浮罌渡口暮雲飛今日昇平兵
不試永教坐鎮拱

皇畿

望終南山

南望岩巖天外峰不知巖壑幾千重朝朝暮
暮晴雲在鬱鬱葱葱佳氣濃須信登攀無捷
徑却疑來往有仙踪蒼松翠栢何年植長對
神京祝華封

贈鄂學如制府

公由藩臬開
府皆官陝西

赴

闕呼嵩春乍還

萬壽時公以楚督來京
旋膺川陝之命

上公舊

節特新頒人懷召伯原分陝

帝拜蕭侯再入關聞昔攀轅齊洒涕看今迎旆盡
歡顏高名更比豐碑峻千古岩巖太華山

其二

當年仗鉞百蠻開

錫命三加績偉哉

公前制楚招撫紅
苗上深嘉賴之

峒戶包茅咸

北貢轅門畫戟又西來恩威久播要荒地文
武兼儲將相才隴蜀望公如望歲一時絕塞

盡春回

其三

從來秦楚號巖疆公望公才並越常德澤感
人羊叔子功名蓋世郭汾陽隨車甘澍南山
徧徹底清流渭水長一路昨謠親聽得福星
重泣荷

君王

其四

殿裏逢君慰別情却來奉使話咸京芝蘭氣
味春常藹冰雪襟懷夏亦清久識鳳毛陪令
子長君現
官中翰虛慙馬齒附同庚還朝早待鋒車

入黃閣東邊聽履聲

醴泉令汪顛三遠送數十里口占謝之
才子分符谷口城繙書別殿舊知名廉泉一
勺甘如醴莫問官衙底樣清

其二

綠酒紅燈駒在庭淹留無計爲王程渭橋送
別千條柳爭似桃花潭水情

六月二十五日早發西安由金鎖關一帶
北抵延安山路崎嶇自茲始矣

西來朝爽快迎眸從此乘輶萬里遊蔽野陰
濃晴亦雨近邊風景夏先秋山無紀數連天
遠花不知名傍澗幽仄徑危峰行未斷那知
絕頂盡平疇

其二

側上肩輿走百盤山重水復近延安飛流絕
澗褰裳渡羅峙羣峰立馬看世路須知高處
險人心還向坦中寬蕩平在在遵王道莫謂
欽崎涉歷難

鄜州道中

緣崖一帶野人家開遍新秋蕎麥花紅雪漫
山間芳草三春桃柳不爭些

清涼山

在延安府東門外

渡水穿雲直上攀金明城郭翠微間清涼大
地三千界塵土勞人半日閒絕磴振衣朝佛

洞

上有千佛洞

深崖洗眼看詩灣

山半有石壁歷來名作皆磨勒

於上名曰詩灣

寺僧遙指溪南塔范相曾題嘉嶺山

山上有石刻嘉嶺山三大字傳是范文正書

其二

乘興還登最上頭萬家烟火望中收仰探鷺
嶺仙巖近有峰最高名曰鷺嶺俯瞰延溪濁浪浮雉堞
參差臨隔岸虹梁縹緲跨飛樓莫嫌憑眺匆
匆別奉使西來此勝遊

過鐵嶺關

土人云楊延昭曾鎮此上有古松一株卽當日掛弓處

行盡千山未見松一株絕頂舞虬龍山僧爲
道楊家將坐鎮雄關此舊蹤

其二

萬疊芙蓉鐵嶺關將軍戍壘夕陽殘掛弓想
見英雄概夜半松風拂指寒

龍湫谷

我馬從東來征塵日奔逐陟彼千仞岡四眺
豁心目側身見沉潭下嵌山之谷晴崖修冥
晦股栗肌起粟不雨自雲烟無風亦綺縠漣
兮漾柔藍黝然發深綠氣象頓萬千變化何
神速若非怪物藏疑有蛟龍宿停鞭問土人
叉手向我復云是龍湫泉太古時已蓄徃徃

使秦草
著靈竒蜿蜒常出浴屈指億萬年曾不聞盈
縮色與衆水殊未許飲人畜或歲值旱乾競
向茲泉祝不須壬癸符但取水一掬捧持供
几筵瑩瑩若青玉須臾雲霧興四野已霖霖
奉水返谷中依舊風瀾蹙以茲民畏敬叢祠
在山麓聞言信且疑斯理孰能燭驅馬去勿
遲靈境難駐足

發干谷驛

又逐征塵發使車嫩涼天氣正秋初沿崖飛

瀑隨高下出岫閒雲自卷舒官驛盡安層頂
上人家多在半空居烟光嵐影重重合一幅
溪山畫不如

清澗道中

結屋編籬樹杪懸蒼崖翠巘接平田朝來雨
霽天如沐馬首山光潑眼鮮

無定河

潺湲日夜聽五渡只初程凡五渡此河不似黃流
徙何來無定名

其二

雨後濤聲壯沙沉戰骨悲春閨無夢到端爲
太平時

將抵榆林

經旬跋涉近榆關猶在雲峰萬疊間每到一
城先渡水會無十里不登山炊烟佛火青霄
上細草叢花碧澗灣乘興幾回思攬勝王程
那得片時間

其二

日向秋山隊裡行山多曾不識山名戍樓時
見牛羊下塞樹稀聞鳥雀鳴馬上饒歌羣谷
應車前旌蓋萬峰迎聚觀野老爭相告賚士

新恩正太平

是日榆林總戎整列
鎧仗遠迎 恩詔

榆林鎮頒賞兵丁

榆谿始自秦種榆成林藪唐設榆林關東鎮
屹稱首銀州引於南駝峰倚其右險要臨荒
沙邊堵劃相守地屬古雲中多出射鵬手天
性本驍悍弧矢喜爲偶以茲駝城兵自昔稱

雄赳上下千年間得失時有自明棄東勝
敵寇臨戶牖退保綏德城此其出哨口塹山
復湮谷墩埃互連耦三十六城堡相倚若臂
肘環野徧屯戍強套自退走爾時邊臣功亦
堪誌不朽凌替及季年兵符嘆解紐闖賊事
焚掠到處恣踐蹂孤城守最堅日夕警刁斗
閉門絕樵蘇操戈及童媢城摧猶巷戰血闕
三日久壯哉勇敢氣詎遜古賁黜我來歷塞
垣駢駢馳四牡三宿長城外圍河夜半吼短

栢覆沙巔秋風動榆柳荒漠望暝烟遺事問
老叟欣欣說太平威遠恃我

后曾經駐翠華躬親蹙羣醜么麼悉芟夷不足當
擊掙復見諸番長爭先奉牛酒白云天末臣

祝

天子萬壽彈箏發歌喉喁喁聲唧喙各藉通譯人
指陳名某某其言雖不文其意良可受但聞
邊地瘠畜積苦不厚鎮兵精且多所急在糧
糗告爾守土人勗哉善厥後

出榆林塞

榆陽城外草萋萋風捲黃沙亂馬蹄漠北塞
雲飛不斷山中野戍望還迷十年此地經
鸞輅萬里於今靜鼓鼙極目古來征戰地平蕪盡
處碧天低

其二

車前迎拜列諸酋共喜今生識狀頭湏酒高
擎環毳帳羗絃低唱近涼州窮邊埃火全無
警斥鹵沙田亦有秋驀地關心民瘼甚荒涼

花馬舊山樓

是年花馬池一帶苦旱

嚮水堡

榆塞西邊第一臺孤城突兀怒濤回旋渦倒
瀉聲如沸疑是天橋駕海來

盤渦噴薄上有石梁跨於水中

土人呼曰天橋

其二

飛雪轟雷駭浪噴千羣萬騎陣雲屯停驂却
憶溪山勝五月觀濤下水門

余邑清溪有上水門五月山

水暴漲至下水門湍急尤甚亦奇觀也

寧夏鎮頒賞兵丁

帝命犒秦兵三邊敷大賚寧州古朔方第一號雄
塞黑水來蜿蜒黃流繞襟帶遙瞻賀蘭山差
峩壓華岱延亘五百里上與浮雲礙相去尚
數程潑眼青如黛驅馬凌晨曦山色良可愛
山腰已曠隴山頂尚鬣鬣東來六十里崇墉
挹秋靄往昔蒸沙築完固茲城最厚方二丈
餘其高更相倍壁壘影龍蛇街衢列闐闐習
俗事華靡屢貨雜珍琲不乏詩禮家如雲集

冠蓋更多勇敢夫從軍尚節概卽今諸將帥
大半出城內環城皆沃土居民業耕耒臥畝
富稻秔引流資灌溉新建大清渠功與漢唐

配

寧夏舊有漢唐二渠同知王仲山新築沃

一渠於中間名曰大清渠民甚便之

田數萬頃歲歲無荒蕨陂池旣澄泓草木復
蓊藟蔬果稠杏陳林園宛轉對所以塞北邊
却與江南賽自漢迄李唐羌戎屢向背元昊
復僭稱桀驁今誰在柰何明季時輕信權奸
輩委棄套內地千古發長嘅爭如我

國家版圖擴前代當年

王赫怒一出鋤元憇稂莠悉芟除螻蟻皆粉碎洗
兵青海頭秣馬陰山背近有范元戎強兵領
百隊曉日耀銀戈皎月流霜鎧行伍整以暇
軍民愛且戴邊事若指掌敷陳獨慷慨讜言
契

廟謨一河界中外羶幕趣遠徙寸土不相貸永
永固疆圉邊城實攸賴

大清渠二首爲寧夏衛司馬王仲山賦

爲憐膏壤棄邊荒七日功成百里塘引入洪
流砂磧裡鑿開峽口賀蘭傍舊有賀蘭渠
與新渠接壤支
分九堡通溝澮鼎峙三渠並漢唐外吏盡如
君任事不難到處樂豐穰

其二

兩渠中劃大清渠畚築無勞民力紆心畫萬
家溝洫志胷藏一卷水經書嵐光樹色晴川
外虹影鷗波夕照餘渾似江南好風景豈惟
灌溉徧村墟寧夏有小
江南之號

洮岷土番自古梗化我

皇上德威遐播更

命制府鄂公移節西秦癸巳秋聞齊赴轅門納款
喜賦一律兼柬鄂公

望風向化自洮岷屈指公來甫十旬不用廟
堂加一矢已聞番部款千人建牙吹角軍門
肅稽顙輸心醜類馴我

后聲靈無弗屆得公宣布倍尊親
由寧夏西發甘肅一路賞閱兵丁

少小窮經未學兵卅年簪筆侍承明曾無萬
里封侯相忽荷三邊賚士榮

鳳詔龍旗輝驛路霜矛雪甲照軍營清時曠典遭
逢盛翻笑終童自請纓

涼州鎮

博望當年使遠通休屠歸地古稱雄梯山絕
險橫天半

城外天梯山最險峻故名

豬野洪流繞郡東

禹貢

豬野澤今在州城東

壁壘經時閒堠火衣冠舊俗號華

風葡萄酒熟銀燈艷一曲伊涼度小紅

涼州賞兵口號

武威九月草蕭蕭壯士彎弓盡射鵰

聖世元戎惟靜鎮將軍不數霍嫖姚

其二

涼秋早雪洒邊城晶甲銀戈照眼明
閱罷軍容呈角技翻騰馬背更崢嶸

甘州歌

天眷下民篤生

今皇爲中夏主德威遐暢聲教溥東漸日出西無

雷南連窮髮北萎羽四彝八絃皆納款願爲
臣妾世藩輔遡自軒黃迄有明上下千百年
來無此大區宇秦中甘州古戰場久息烽烟
靜輦鼓我來奉

命賚二軍挾纊歡聲徹編伍渥注名馬走龍駒屯
衛精兵列貔虎重鎮控番彝三面山環堵山
峰咫尺對峙閱武堂觀茲景物不覺生懷古
秦漢以前本西域拓地開疆自孝武嫖姚萬
騎踰焉支轉鬪臯蘭戰獨苦臣渾邪收休屠

列郡新開屬國五郡中此地最稱雄酒泉居
右武威居左乃河西之襟喉抑華夸之門戶
地勢真同兩臂張郡名張掖以是取典午衰
時有五涼紛紛竊據安足數唐家回鶻輒侵
凌宋室曩霄亦跋扈金元分路置官司明棄
燉煌將士懦今日千秋萬歲城二城皆寶
融所築盡
入提封稱樂土時清戰士並耕農歲稔窮邊
集商賈塞外黃番聞犒兵亦來候迎爭負弩
自言頂戴

聖人恩羅拜馬前獻潼乳矧茲形勝奇扼吭斷羗

虜插天矗龍頭截地蹲人祖

龍頭人祖
皆山名

更有

南北山連大馬營中通一線尤險阻居延海
浸碧雲低弱水東導自神禹溯源不必泛星
槎遠望恍然見天柱雪霏霏日亭午馬嘽嘽
戒靡監驅馳周道未登臨紀行聊當輜軒譜
秦中山多石壁橫亘數千里不可殫紀聊

綴五字一章

誰剖媧皇石撐開半壁天作屏三輔壯排戟

萬峰連不礙雲橫過常看樹倒懸山中何所
有日夜水潺湲

十月十四抵肅州連日天氣晴暖幾不知
有寒塞之苦

誰云西塞苦寒邊一路東風向酒泉自是
君恩多挾纊不關時節小春天

肅州鎮頒賞兵丁

十月東風吹遠陌馬蹄正踏天山雪天山番
語號祁連山去青天真咫尺延袤三州千里

餘遙接崑崙入沙磧拔地撐霄無際涯天分

界與華彝隔層冰積雪不知年雲出山腰羃

山春雲連冰雪杳難明灑氣冥濛惟一色有

時雲散露峰巒纒玉堆瓊皓然白馬前氣象

幻萬千倏忽陰晴易朝夕羣山西走勢中斷

寔若當空闢戶闕嘉峪名從玉石分

關直比丸泥塞東連羗谷是天城

嘉峪關名羗谷又天城

遠

鎮番彝扼其隘登高極目瀚海西碧天低處

誰窮歷瓜州城中瓜葉黃沙州城外寒沙赤

玉關西去更陽關秋風楊柳羗兒笛關外瓜
沙關內城酒泉一郡真雄傑孤懸絕塞控三
邊中通一綫趨中域

聖朝經制邁前王坐臨萬國來重譯赤斤罕東列
外衛哈密藩臣更宣力卽今余爲犒師來率
衆歡迎齊手額日趨公廨頌

皇恩世備西封沐膏澤其餘內附且紛紛彘民雜
處猜嫌釋雕弓朝射嶺頭雲花棉夜向燈前
織矧茲連日降明霜土人以日間所降爲預
明霜知來歲必稔

卜來年多刈獲討來泉水沃川原討來泉名邊氓
處處滋蕃息西域無勞遠泛槎天山不用誇
鳴鏑閉關謝贄亦何爲須信乘時原在德
自甘肅東回仍經涼州再賦兼東袁總戎
西去重來剛匝月俄看道左樹穹碑軍民何
事多情甚揮涕相攀進一卮

其二

軍樂砮鉤殷地雷名園載泛夜光杯王翰涼州詞葡
萄美酒景宗險韻詩成後應笑陰鏗未是才
夜光杯

早發渡河行水溝堡五十里晚抵老鴉堡
每出晨戴星行久纔候旭盡日周道馳常在
山之麓今早渡層冰漸引入邃谷谷中迢迢
五十里詭譎盤迴往而復一徑杳然隍塹深
兩崖偪處巖牆矗日方中風轉肅裘帽霜凝
猶可掬水溝堡內行逡巡馬蹄蹴踏迸寒玉
前途形勢更參差遠近縱橫頻起伏忽陟重
岡忽登平陸忽如長巷幽忽若昏衢燭乍看
雲在頂忽訝雲生足綏轡劇倒顛心魂殊輓

輓豈不憚險艱

王事所當勗朔氣晚逾寒曾未停車轂黃雲低接
炊烟平繚垣屯堡遙相屬君不見昏鴉飛倦
亦知還聯翩齊向荒莊宿

西寧鎮

青海遙連積石山設州地險衆峰環湫泉噴
湧聲如沸雪嶺岩巉勢可攀羗鎮卑禾鳴鏞
靜閣憑綏遠戍歌閒駝酥潼酒爭來獻絕塞
名王正款關

西寧鎮賞兵紀事

秦兵天下雄諸鎮控遐邇賞閱塞北周幾欲
歎觀止西寧處極西番回相錯趾時方際嚴
冬踏冰渡湟水朝出城東門排營森壁壘將
含鷹隼姿籍隸虎貔士蔽日耀兜鍪追風騁
駮駟陣法亦縱橫左右聯角倚矸然礮石聲
烟凝塞垣紫猛烈轟雷霆堪與肅鎮比聞昔
破羗夷所向輒摧靡荒陬掃封狐重譯獻馴
雉今年叩制轅傾心願內徙洮岷有土官率

衆迎

詔旨新附生番人尚未嫺拜跪長髮披鬢殊貌
增怪傀侏離語莫曉舞蹈狀難擬狄鞮通其
言生長在邊鄙幸受

聖人恩感激入肌髓又云公大臣奉

命走萬里遠人望清風得覩心竊喜我媿諸番言
我

皇實活爾爾屬雖殊方

皇仁總一視又有五國師蘭奢參佛理棗柰申野

芹哈裕當文綺哈裕形如絹幌彼處所織膜凡貢獻餽遺皆以此為敬拜且致辭

萬壽今方始普天大聲靈六宇同倫軌
至德人所依西土非逃矣

蘭州初度

向曉觀兵雪霽天滿城燈火夜歸鞭忽看公
解賓僚集不覺浮生又一年

其二

行到臯蘭添線時勞勞初度未成詩羗兒却

效躋堂祝短句長歌介酒卮

時軍民有以謠頌見投者

蘭州

馬渡洪河凍不流浮梁斷岸接飛樓水塢迤

邈環龍尾

龍尾山名

士氣赳桓半虎頭千里塵兵

傳去病

霍去病出塞千里塵兵臯蘭

十齡從父拜防秋

渾城

蘭州人善騎射隨父隸帳下防秋

我來憑眺當清晏雪影巒

光一望收

清聖祠

塞上春寒冽霜乾古道平蒼涼殘照裡憑弔

首陽城義士忠而孝仁人弟並兄登山非傲
世遜國豈沽名不際黃農代難移薇蕨情荒
祠遺範在長映渭河清

楊椒山祠

嶽麓西偏路蒼茫宿霧昏鳳臺瞻道貌馬市
泣忠魂謫宦生徒集窮邊禮教存

公謫狄道
時講學於

此千秋遺浩氣何必訟秦寃

固原鎮頒賞兵丁

洮隴西來歲將闌風高野曠行人寒踏地馬

聲時篤速連宵雪勢方迷漫凌晨策馬陟東

阜晶山銀海真竒觀坡陀凍滑頻上下六盤

峻折勞躋攀緣崖迴磴徑徃復披榛歷莽行

蹣跚幾經登頓到山頂山高直出浮雲端山

頭風雪正大作烟雲繞果圍成團人馬咫尺

竟莫辨但如駕霧凌風翰馬過前峰忽清朗

豁然大地山河寬陰霾餘霰淨如掃惟聞雪

溜聲潺潺官驛一宿至開遠

開遠縣名

晴郊彌望

無巘岼開城正當全陝腹左控涇涼右臯蘭

民雜五方地四達羣萃勢易藏豪奸州衛轄

治費經理城墉修繕頗堅完教場背山作屏

障楊巨源詩衝平岡三百列堵環前朝制府

屢駐節新移大帥登雄壇七旬老翁猶矍鑠

謂鎮綏將軍潘飛天黃金斗印懸腰間百隊犀兵連鎖

甲三千鐵騎鏤金鞍四塞之國用武地承平

日久戍卒閒柰何疇昔歲屢旱有司壅不聞

民艱

天子西顧咨大吏惻然午夜懷痼瘵十行蠲賑詔

風發邊城萬戶歌聲歡父老聞余來犒士感

恩忭舞羅車轅且感且訴陳疾苦賴今我

后起凋殘聆言不覺心戚戚聊給升斗資豆簞脚

踟詰旦戒前道臨岐攬轡重回看

馬嵬坡

六軍齊駐馬嵬坡一霎安危可柰何霓羽換

將三尺帛何夢珪詞霓羽佛堂誰與對星河

平涼道中

星回冰雪尚催顏指點荒城落照間人烟寂

歷虛歲事馬蹄躑躅辜春山天險乍過金佛
峽郵程再宿瓦亭關崆峒遙望不可即皂鶴
飛去何時還

東湖

湖畔有喜雨亭君子亭

雨後波光倒鏡奩六橋勝事兩亭兼東湖烟
水西湖月占斷風流是老髯

其二

當日亭緣喜雨名今來却喜雪初晴懸知雨
霽涼生候翠竹紅蓮照水清

其三

停驂片刻憇寒林瀲灩湖波動客心記得西
泠涼月夜藕花十里放船深

連雲棧

誰從月窟覓丹梯直躡青霄萬象低絕磴盤
空頻下上亂峰迴合失東西披榛一徑何年
闢卓戟千行老樹齊欲問留侯辟穀處蒼茫
紫栢暮雲迷

相傳紫栢山爲留侯辟穀處

其二

攀蘿捫壁上岩巖絕頂天風散次寥澎湃江
聲噴石齒空濛雲氣鎖山腰虎頭南望雞頭

峻鳳嶺西連馬嶺遙皆山名可惜漢川名勝地

經過常是傍深宵日短路遙每至公館輒漏下二鼓矣

漢南道中

一從春信隔年回行盡東風未放梅獨有漢

南花事早山桃已見十分開

其二

清江水色宛清溪余家德清溪水最清故名清溪也有山禽

自在啼可似家鄉春放棹紅橋綠樹聽黃鸝

由渭門登舟涉漢江次早抵石泉縣

高峰夾岸走灘聲雨過春江放棹輕一夜蓬

窓看明月朝來又上萬山行

江行

何處落飛泉奔流入漢川一泓清徹底百折

曲緣邊柳子厚興州江運記觸石驚濤壯擊

舟倒纜牽灘聲渾不寐月上萬峰巔

其二

一線清江路分開兩岸山浮空光瀲灩落處
響潺湲漫說猿聲楚何來鳥語蠻經年勞跋
涉小艇暫乘閒

途中喜聞西蜀蠻苗亦納款內附口占一

律再東鄂公

不隔要荒不隔時不勞文告不勞師聲馳響
應功何速異類同孚事更奇三戶創開狷
地半年全服朔南彘從今更有招徠處那得
搜腸如許詩

將抵興安州自隆亭舖至環珠廟沿江行

礪道數十里惕然有作路最險狹土人皆呼為礪

經行秦地遍山礪最寒心窄徑無三尺危崖
有百尋忠臣聞叱馭孝子戒臨深銜命

君恩重毋為蜀道吟

興安州

聞說蠶叢蜀道難險猶未必似興安江奔急

峽三千里谷走連山八十盤儻駱二谷連山凡八十二盤方

出谷至唐代六師頻駐蹕唐德僖二宗俱會幸梁洋宋家

百戰舊登壇

宋吳玠於此屯戌交戰

太平時節春偏早

滿目鶯花拂錦鞍

興安鎮頒賞兵丁

環珠廟前春草生環珠廟下江流鳴懸崖仄
徑不可度啣鱸倒拽橫江行興安州城跨崑
谷控帶巴蜀連蠻荆三千組甲宿丁壯鎧仗
煜煜搖光晶我來頒賞更閱武華燈簇影騶
前迎扶攜撐拄歷礪道各各羅拜杼丹誠戟
手科頭身趨捷追風躡電飛流星生搏虢虎

出箐莽天低雲暗層嵐冥賞閱至此稱後勁
兵不貴多惟貴精

下茅坪早發

忽爾披靈境晨光落翠微家山朝與暮風景
是耶非流水桃花逕平橋楊柳磯豈期逢此
地坐卧欲忘歸

過秦嶺

一路欹欹歷未曾今來秦嶺倍峻嶒雲生古
洞多年石寒鎖深崖隔歲冰度嶺行人頻蹙

夔盤空走馬亦凌兢不知對面千峰雪更在
遙天第幾層

礪道行

曉發琉璃溝登陟路透迤黯淡宿霧披行行
入山嘴山高徑漸危澗折道彌俛時當二月
初春淺寒未已斷岸層冰連曲坳古雪絜

潘尼

釣賦連
翻雪累

雲根結奇境名狀不勝紀諸礪最嶮

巖嶒惡難比儼岩蹲卧虎羣岡曳修蛇尾陡
壁左相挨深厓右無底峰尖立劍鋸石稜磨

鋸齒雞上架欲翻鬼見愁復死

雞上架鬼見
愁皆礪名

乍聞心膽驚今經汗額泚駭目不敢睨攀手
不敢指我馬恐蹶蹄我僕畏顛趾窮年事行
役七日抵萬里賴有道傍花山桃雜野卉沿
蹊映水紅翻愛丘壑美出此大泥谷豁然道
如砥回望終南山峩峩斜照裏

連日山行路甚險僻無異羊腸鳥道獨桃
花盛開繽紛不斷喜而賦此

溪水粼粼漾淺沙穠桃開處爛成霞令人忘

却崎嶇路踏遍千山總是花

其二

冶容偏不礙蠶叢高下繁枝深淺紅野店山
邨千萬樹也隨楊柳舞春風

賞兵口號

歡迎

丹詔戶焚香童叟環觀似堵墻自笑少年今白髮
頭銜猶說狀元郎

其二

道是仁民更恤兵滿街尸祝寫長生吾
君峻德臣何有尺紙多慙署姓名

軍中樂二十四首

恩詔西來父老迎千村萬井賀昇平喧傳盛典真
希覲

聖壽今年特犒兵

其二

河山百二地圖雄勁旅強兵冠宇中

宇中見兵畧註

云四渙汗宣來

宇也

三殿詔黃沙紫塞總春風

其三

敷天大賚首秦關銖兩都將正賦頒較昔

西巡恩更遠新膏萬里到天山

康熙四十二年
聖駕西巡會

賞閱督撫兩標
及固原兵丁

其四

天語煌煌下直廬按營親要歷村墟全秦人拜朱

提寵十萬曾無涓滴虛

全秦之兵
不下十萬

其五

檢籍呼名里系詳家分戶給徧戎行欲知

帝德難窮處太華山高渭水長

其六

恩波直已過龍堆絕漠春從天上回兕虎熊

罷齊手額歡呼動地一聲雷

其七

原從

仁壽沛弘施不是尋常等犒師北向山呼天咫尺

笙歌一派儼朝儀

每賞畢眾軍皆北向謝
恩必令奏樂以榮君賜

昭盛
典也

其八

捧得精鏐馬上歸全家老穉沐恩輝時平豈
羨唐宗事辛苦沙場始賜衣

其九

八郡三邊感切膚千羣萬騎並歌呼投醪挾
纊傳聞舊我

后深仁振古無

其十

軍營已徧沐

恩綸訓練還傳

誥誠諄一日不教忘武備

天心篤眷是西秦

其十一

角弓影抱關山月組甲光生邊塞秋正是
聖朝全盛日軍威到處震遐陬

其十二

奇正方圓陣勢分縱橫變化入風雲軒轅心

法誰傳得指授成謨本

大君

每營賞閱後皆各演陣法

其十三

白羽瑯弧壓寶刀旌旗簇簇馬蕭蕭縱教名

列賢書貴仍向雲中日射鵬

各營中多有中式武舉仍遵

旨食糧操演武藝

其十四

雍容甲士有文儒豈特赴桓羨武夫韜畧盡
從書卷得古來兵法在孫吳

其十五

况今

聖誕闢恩科械樸干城並網羅

壽考作人無二視鼓鞞聲裏聽絃歌

萬壽恩科特闢文武兩闈

近又奉旨許文武交互應試

其十六

塞外諸酋久戴恩聞風絡繹叩旌門環呼

聖德天來大膜拜朝朝禮

世尊

榆林寧夏涼州甘肅西寧及洮岷等處遠近番彝聞恩命到時皆相率叩迎道左備奏

之感語 之恩

其十七

不遠

天威對使星欣逢盛事到邊庭羗絃也效南山曲

莫作伊涼塞上聽

其十八

遐邇穹廬總一家風清四塞靜鳴笳書生全

未諳軍旅奉使還勝博望槎

其十九

日覩諸營祝華封瀕行還見整軍容擎觴願

藉皇華使好把愚忱達

九重

每賞畢起行衆兵仍列隊伍攜酒肴送至郊外感頌 天恩羣願代奏

其二十

吾儕生長在邊荒沙磧難耕賴月糧格外又

沾新雨露從教瘠土亦豐穰

其二十一

五十餘年豢養深况承內府錫兼金彎弓躍

馬尋常事未盡酬恩一寸心

其二十二

鑄得銀牌供佛前
感恩晨夕一爐烟
太平時節無由報
只祝

君王萬萬年

其二十三

迢遞三秦隔帝臺
未能介社上蓬萊
呼嵩猶喜南山近
長戴

堯天作壽杯

其二十四

曆數無疆福祿申

乾行益健益精神
每逢十載恩加渥
關隴河湟處

處春

復

命恭紀

經年跋履戴星馳
閱盡秦山漢水奇
十萬軍

營三萬里千篇碑
記百篇詩

衆兵感激 天

有碑記臣升元
幸得綴名於內

譜成西塞軍中樂
獻作南山

殿上卮翹首

禁園春色滿還朝祝華正芳時

皇帝御宇之五十一年歲癸巳三月恭逢

六旬聖誕垂恩錫祉普及無垠於是修祭告之典
尊禮嶽瀆及歷代帝王陵又大發帑金分命
大臣賞闕各直省綠旗官兵維時我

舅氏今御史大夫德清蔡公以內閣學士兼禮
部侍郎奉

命往秦中歸而哀其使秦詩若干首壽世以小子
應楨昔親侍鞭鐙而朝夕於公之側也命誌
名卷末小子受而讀之竊歎公任使之專受

事之勤感人之深且速而其詩之發揮風雅
鼓鑄精華爲足以名世而傳後也攷古帝王
自軒轅以下陵寢半在關中周有豐畢漢有
咸陽神明之隩而長安重地屯設羽林踰汧
度隴則漢之河西五郡唐之四鎮北庭尤天
下勁兵處奉宣德意視他使者爲倍難公之
銜

命而西也沿途祗肅務以不擾官民爲兢兢故每
入一境必先行檄諭毋飾館宇毋盛供張減

騎而郵驛不驚蔬食而厨傳不脩初至秦疆
展謁諸陵虔恭禋祀禮成而行不淹時日及
遍歷營汛以時頒賞則先令所司將實數固
封當衆驗發寧多毋少旣遍給之無濫及者
屆期宣布

皇仁且慰且誠又復嚴飭戎伍申明紀律審虛實
核真僞別勤惰考優劣精明之中寓以渾厚
優恤之內濟以整齊各營將士見公之寬嚴
並用恩信兼孚莫不歡躍忭舞聲震山谷而

緣邊番彘聞使者至亦皆于于而來稽顙膜拜匍匐馬首嗚咿而歌盛典焉先是秦地久旱民以爲憂及是大雨沾足民皆呼爲蔡公雨而甘涼一帶素號苦寒公至則暄煖如春又人人歎異以爲使者敷施

天澤真有陽春隨轂至也事竣北還全秦之兵民士庶作爲衢謠勒之金石頌

天子之厚德紀使臣之清風載道謳吟穹碑遍峙而公輶軒所過問俗采風形諸咏歌富有卷

帙凡山川之險要關塞之雄竒軍容之壯麗以及古今人物之瑰偉草木蟲魚之瑣碎亦俱附見篇什中何其盛歟小子伏念公少壯登朝珥筆

禁近恪勤慎密爲

主上所親信其發爲文章渟蓄迤邐包涵萬有如前所刻紀恩詩若干卷旣已鏗錡炳烺酌雅稟謨一時館閣諸公爭相傳誦奉爲楷模稱一代應制巨手而復性耽佳句豪於吟詠雖

馬上不少輟筆如此且茲役經行迢遞往返
踰年小子昔者私有筆劄記其月日迄今覽
道途所經由西安入鄜延路至延安過鐵嶺
關出榆林塞抵寧夏涼州歷甘肅東還沿湟
中至西寧越洮岷踰朝那入固原自渭門涉
江達于興安復由徧道諸險回會城蓋紫塞
黃沙雲坂飛棧步騎顛頓不下二萬餘里亦
云瘁矣然公於公務之暇時時手側理紙揮
翰若飛每出語天成波瀾綺麗更若有得於

江山之助者以公資性絕人流覽成誦且根
柢深厚貫穿百家而又熟精格律刻意研思
爭得失於毫釐分判之間宜其足以鼓吹休
明黼黻鴻業且合三秦之土風物象令覽者
披之而如覩也 楨自幼從公學詩垂三十載
不能得公之萬一是行實隨侍左右目擊盛
事集成得附名其後傳之永永此則小子之
厚幸也夫康熙五十七年嘉平穀旦受業甥
吳應楨拜手恭跋

圖書



